

輿地廣記卷第九

京西北路

南輔潁昌府春秋許國戰國屬韓秦置潁川郡漢高帝爲韓國尋復故後漢因之獻帝暫都之魏晉並爲潁川郡後魏亦同西魏初得之後入東魏改曰鄭州後周曰許州隋開皇初郡廢大業初州廢復置潁川郡唐武德四年曰許州天寶元年曰潁川郡後升忠武軍節度梁改爲匡國軍唐滅梁復曰忠武 皇朝元豐三年升潁昌府崇寧四年建爲南輔今縣七

次赤長社縣本鄭長葛邑其社中木暴長因名長社二漢及晉屬潁川郡後魏爲郡治焉酈道元爲郡守於南城西側修立客館土下得一木根甚壯大疑是故社怪長暴茂者也隋開皇初改爲潁川縣唐武德四年復爲長社屬許州許田鎮本許國二漢爲縣屬潁川郡獻帝都之魏文帝改曰許昌故城

地九

京西北路

一

在今鎮南三十里晉爲郡治焉隋屬潁川郡唐屬許州後唐避諱改曰許田 皇朝熙寧四年省入長社

次畿鄆城縣戰國時爲魏邑史記楚昭陽伐魏取鄆是也二漢及晉屬潁川郡其後廢焉隋開皇初置鄆城縣屬潁川唐始屬蔡州長慶元年屬許州有漢召陵縣故城在東春秋齊桓公伐楚次于召陵是也後漢征羌縣故城在東南

次畿陽翟縣本夏禹之別都後爲鄭櫟邑戰國韓景侯自新鄭徙都此秦置潁川郡二漢因之晉屬河南郡東魏置陽翟郡隋開皇初郡廢屬襄城郡唐始屬河南府會昌三年屬許州有鈞臺在南左傳所謂夏后有鈞臺之饗卽此

次畿長葛縣本漢許縣地隋開皇六年分許昌置取長葛舊名屬潁川郡唐屬許州

次畿臨潁縣漢舊縣屬潁川郡東漢至隋皆因之唐屬許州繁

城鎮本漢潁陰縣之繁陽亭魏文帝受禪於此置繁昌縣帝既受禪自壇而降曰舜禹之事吾知之矣壇前有二碑後其碑六字生金論者以爲司馬金行故曹氏六世遷魏西事晉晉屬襄城郡隋屬潁川郡唐正觀元年省入臨潁後唐避諱改爲繁城

次畿舞陽縣漢樊噲所封二漢屬潁川郡晉屬襄城郡後改爲北舞置定陵郡隋開皇初郡廢屬潁川唐正觀元年屬許州尋廢開元四年復置更名舞陽有漢定陵縣故城

中郟縣春秋時爲楚邊邑令尹子瑕城郟是也漢屬潁川郡後漢省之魏復置青龍元年有龍見于郟之摩陂明帝幸陂觀龍於是改摩陂曰龍陂城曰龍城晉屬襄城郡其後廢之置龍山縣隋開皇初改曰汝南十八年改曰輔城大業初改曰郟城屬襄城郡唐屬汝州 皇朝崇寧四年來屬

地九

京西北路

二

西輔鄭州高辛氏火正祝融之墟周武王封管叔鮮及爲虢鄩之國鄭武公與平王東遷武公滅二國而徙都焉後鄭爲韓所滅韓又徙都之秦屬三川郡二漢及魏屬河南郡晉置滎陽郡後魏爲東恒農郡東魏置廣武郡後周置鄭州隋開皇十六年曰管州煬帝初復爲鄭州尋廢置滎陽郡唐正觀元年州廢自武牢移鄭州治此天寶元年曰滎陽郡 皇朝景祐元年號奉寧軍節度崇寧四年建爲西輔今縣六

望管城縣故管國周武王弟叔鮮所封春秋晉師救鄭楚子次于管以待之卽此漢晉爲京縣地隋開皇十六年析內牟以置管城屬滎陽郡十八年改內牟曰圃田省入管城唐正觀七年自武牢移鄭州治此東有圃田爲豫州藪有郟城爲縣南左傳晉楚戰處

滎滎陽縣故虢國所謂東虢也二漢屬河南郡晉泰始二年置

滎陽郡後魏因之北齊改曰成臯郡隋開皇初郡廢屬鄭州唐因之有鴻溝在西楚漢中分天下處漢京縣故城在東古鄭邑也莊公弟叔段居之謂之京城太叔二漢屬河南郡晉及後魏屬滎陽郡北齊省入焉又有索水楚漢戰京索間卽此

上新鄭縣古有熊國黃帝所都也亦爲高辛氏火正祝融之墟其後世爲鄩國亦作檜詩之國風所謂檜羔裘者也鄭桓公始封在今華州之鄭其子武公與平王東遷乃取鄩而徙居焉是爲新鄭戰國時鄭滅於韓韓哀侯自平陽徙都之二漢屬河南郡晉以後不置隋開皇十六年復之屬滎陽郡大業初省菀陵縣入焉唐屬鄭州有溱洧二水

中原武縣二漢屬河南郡晉以後不置隋開皇十六年復之屬滎陽郡唐屬鄭州漢卷縣故城在東

地九

京西北路

三

中滎澤縣禹貢所謂濟水溢爲滎者也杜佑云今濟水不復入滎漢晉後魏爲滎陽縣地隋開皇四年置廣武縣仁壽元年更名滎澤屬滎陽郡唐屬鄭州有廣武山上有東西二城中有絕澗漢高帝項羽相與臨廣武之間而語卽此有敖山商王仲丁自亳遷此周宣王常狩其地故詩言搏獸于敖秦於此置倉所謂敖倉也故王宮城在今縣西北左傳作王宮于踐土卽此今故城內東北隅有踐土臺是也

畿密縣本鄭邑春秋諸侯伐鄭圍新密二漢屬河南郡晉屬滎陽郡唐屬河南府 皇朝因之崇寧四年來屬

輔滑州古豕韋氏之國春秋時屬衛戰國時亦屬衛其西境屬魏秦屬東郡二漢因之晉爲陳留濮陽二國宋武帝平河南置兗州以爲邊鎮後魏置東郡隋置杞州後爲滑州又改爲兗州後復爲東郡唐復爲滑州天寶元年更名靈昌郡大曆七年升

義成軍節度後避梁王父諱改曰宣義軍後唐復故而改靈昌曰靈河 皇朝太平興國四年改武成軍今縣三

中白馬縣本衛國曹邑左傳閔二年狄滅衛立戴公以廬于曹卽此二漢爲白馬縣屬東郡袁紹遣顏良攻東郡太守劉延於白馬關羽爲曹公斬良以報焉晉屬濮陽國宋置兗州後魏置東郡隋開皇初郡廢置杞州十六年改爲滑州大業二年改爲兗州後復爲東郡唐又爲滑州有黎陽津一曰白馬津酈生云守白馬之津是也有靈河津晉時石勒襲劉曜途出於此以河水泮爲神靈之助故號爲靈昌津後唐改爲靈河津靈河鎮漢南燕縣地隋開皇十六年置靈昌縣以津爲名屬東郡唐屬滑州後唐改爲靈河縣 皇朝治平三年省入白馬有滑臺本鄭之廩延邑其城甚固

望韋城縣故豕韋氏國商時爲伯焉韋賢詩曰肅肅我祖國自豕韋是也二漢爲白馬縣地屬東郡晉屬濮陽國隋開皇六年置韋城縣屬東郡唐屬滑州

繁胙城縣故南燕國二漢爲南燕縣屬東郡晉省之其後復置曰東燕隋開皇十八年改曰胙城屬東郡唐屬滑州胙城周公諸子所封左傳富辰曰凡蔣邢茅胙祭周公之嗣也杜預注東郡燕縣西南有胙亭而晉史地理志無此郡縣豈永嘉喪亂簡編失亡故邪

望孟州春秋戰國皆屬周自漢晉至隋皆屬河內郡唐顯慶二年割屬河南府建中二年乃以河南之河陽河清濟源溫四縣租稅入河陽三城使又以汜水軍賦益之會昌三年遂以此五縣爲孟州今縣六

望河陽縣古孟津也周武王伐紂師渡孟津卽此亦曰富平津魏尙書杜君畿試船沈溺之所浮橋卽晉杜預所立自漢至

隋屬河內郡唐屬河南府置河陽三城使後置孟州今縣西南十三里有遮馬隄舊爲河陰縣地後魏尔朱榮害朝士千三百餘人卽此

望濫縣本周畿內國司寇蘇忿生所封也春秋僖十年狄滅濫蘇子奔衛於是襄王以賜晉文公二漢屬河內郡晉因之其後廢焉隋開皇十六年復置屬河內郡唐武德四年屬懷州顯慶二年屬洛州後屬孟州

望濟源縣周大夫蘇忿生之原邑周襄王以賜晉文公文公伐原以示信二漢爲軹縣地晉爲沁水縣地俗以濟水重源所發因謂之濟源城隋開皇十六年置濟源縣屬河內郡唐武德四年屬懷州顯慶二年屬洛州後屬孟州漢軹縣屬河內郡後漢及晉皆因之隋大業初省入河內後復置唐正觀元年省入濟源故城在縣東南有溴水春秋襄十六年公會諸

地九

京西北路

五

侯于溴梁卽此

上汜水縣本東虢國鄭滅之爲制邑所謂制巖邑卽此有故虎牢城周穆王獵於鄭圃獲虎命畜之因名曰虎牢二漢爲成臯縣屬河南郡晉因之宋時毛德祖戍虎牢後魏晝夜攻圍二百日乃克後魏置東中府東魏置北豫州後周置滎州隋開皇初曰鄭州十八年改成臯縣曰汜水大業初置虎牢都尉府屬滎陽郡唐屬鄭州顯慶二年屬洛州垂拱四年曰廣武神龍元年復故後屬孟州有汜水關 皇朝大中祥符中改爲行慶關東南有成臯故關西南有旋門故關

中河陰縣漢成臯滎陽懷縣地唐開元二十九年割汜水滎澤武陟三縣置以便運漕屬河南府領河陰倉汴渠在縣南二百五十步卽古蒗蕩渠今名通濟渠首受黃河後屬孟州有三皇山亦曰敖鄙山山上有三城卽劉項相持處

中王屋縣古召公之邑漢垣縣濩澤地屬河東郡晉屬河東平陽郡後魏置長平縣後周改曰王屋又置懷州及平齊州廢置王屋郡隋開皇初郡廢屬河內郡唐武德元年更名邵伯屬邵州正觀元年屬懷州顯慶二年復故名屬洛州 皇朝慶曆三年來屬有禹貢王屋山泇水所出

緊蔡州春秋時屬沈蔡戰國屬楚魏秦屬潁川郡漢置汝南郡後漢及魏晉皆因之宋及後魏兼置豫州以爲重鎮東魏置行臺後周置總管府後改曰舒州尋復曰豫州後改曰蔡州隋開皇初郡廢大業初州廢復置汝南郡唐武德三年曰豫州天寶元年曰汝南郡寶應元年改曰蔡州 皇朝景祐二年升淮康軍節度今縣十

上汝陽縣漢平輿宜春安城縣地屬汝南郡後漢及晉皆因之後魏曰上蔡置汝南郡城之西北汝水枝別左出而北流又

地九

京西北路

六

屈而東轉又西南會汝若垂瓠故謂之懸瓠城宋元嘉二十七年後魏太武攻懸瓠汝南太守陳憲拒守四十餘日不拔隋開皇初郡廢大業初復置縣曰汝陽唐爲蔡州漢有汝陽縣在西華南頓之間非今縣也漢宜春縣屬汝南郡後漢曰北宜春晉因之後廢焉故城在今縣西南漢平輿縣故沈國漢高帝四年置汝南郡後漢因之晉屬汝南郡後徙焉故城在今縣東漢安城縣屬汝南郡後漢及晉皆因之後廢焉故城在今縣東南

上上蔡縣故蔡國蔡叔始封地秦爲上蔡縣李斯其邑人也漢屬汝南郡後漢及晉皆因之後魏改爲臨汝北齊廢之隋開皇中置曰武津大業初復改爲上蔡屬汝南郡唐屬蔡州中新蔡縣古呂國春秋時蔡平侯自上蔡遷此故曰新蔡二漢屬汝南郡魏晉屬汝陰郡南齊置北新蔡郡後魏曰新蔡郡

北齊曰廣寧郡隋開皇初郡廢十六年置廣寧縣仁壽元年改曰汝北大業初改曰新蔡屬汝南郡唐屬蔡州漢鮦陽縣屬汝南郡後漢因之晉屬汝陰郡北齊廢之隋開皇十一年復置屬淮陽郡後廢焉故城在今縣北有葛陂

中褒信縣後漢舊縣屬汝南郡魏晉屬汝陰郡宋改曰包信隋大業初復故名屬汝南郡唐屬蔡州西南有白亭楚王孫勝爲白公卽此

中平輿縣漢舊縣後廢隋大業初改新蔡爲平輿屬汝南郡唐屬蔡州有葛陂水經云億水左迤爲葛陂方數十里水物含靈多所包育後漢費長房投竹化成龍處

中遂平縣故房子國國語所謂周昭王娶于房曰房后是也楚靈王遷房於楚而有其地後以封吳王之弟夫槩爲堂谿氏故曰吳房漢屬汝南郡後漢及晉皆因之後曰遂寧隋大業

地九

京西北路

七

初改曰吳房屬汝南郡唐屬蔡州元和十二年平吳元濟更名遂平

中新息縣故息國二漢屬汝南郡晉爲郡治焉後魏置東豫州梁曰西豫州又改曰淮州東魏復曰東豫州後周曰息州隋大業初州廢屬汝南郡唐屬蔡州漢安陽縣故江國也二漢及晉皆屬汝南郡後廢焉故城在今縣西

中確山縣本漢安昌縣屬汝南郡後漢省之其後復置隋開皇十八年改爲朗山屬汝南郡唐屬蔡州 皇朝大中祥符五年改爲確山漢朗陵縣屬汝南郡後漢及晉皆因之後廢焉故城在今縣西南有道城故道國左傳曰江黃道柏皆弦姻也在漢爲陽安縣後漢及晉皆因之後廢焉

中眞陽縣本漢慎陽縣屬汝南郡慎字本作眞音眞永平五年失印更刻遂誤以水爲心也後漢及晉皆因之後魏置郢州

東魏廢州置義陽郡北齊廢郡入保城縣隋開皇十一年廢保城十六年置眞丘縣大業初改曰眞陽屬汝南郡唐屬蔡州漢新陽縣屬汝南郡後漢因之晉省焉故城在今縣西南中西平縣故柏子國漢舊縣屬汝南郡後漢及晉皆因之後魏置襄城郡北齊改曰文城郡隋開皇初郡廢屬汝南郡唐屬蔡州

上陳州包犧氏都曰太昊之墟周封舜後媯滿於此以備三恪爲陳國楚滅爲縣楚頃襄王自郢徙都此兼爲魏境秦屬潁川郡二漢屬淮陽國汝南郡後漢因之晉屬梁國汝南郡後魏置陳郡及北揚州北齊改爲信州隋爲陳州後置淮陽郡唐爲陳州晉開運二年置鎮安軍節度漢初軍廢周廣順二年復之今縣五

緊宛丘縣周時陳都楚頃襄王滅之自郢徙都焉陳勝反秦據

地九

京西北路

八

陳自立爲張楚漢高帝置淮陽國章和二年改爲陳國晉併入梁國後魏曰項置陳郡隋開皇初改縣曰宛丘而郡廢焉大業初爲淮陽郡唐爲陳州爾雅曰丘上有丘曰宛丘今其地形則然有古固陵城項羽南走固陵卽此

上項城縣本項國戰國屬楚項羽家世楚將封於項故姓項氏二漢屬汝南郡晉屬梁國後魏置楊州及秣陵縣梁改曰殷州東魏改曰北楊州後齊改曰信州後周改曰陳州隋開皇初改秣陵爲項城縣大業初州廢屬淮陽郡唐屬陳州

中商水縣本漢汝陽縣地屬汝南郡後漢及晉皆因之後魏置汝陽郡北齊郡廢隋開皇十六年置澱水縣大業初省汝陽入焉屬淮陽郡唐屬陳州 皇朝建隆元年改爲商水漢地理志汝南有灑彊縣水經注云灑水出潁川陽城縣少室山東逕灑彊縣故城南又東逕西華縣故城南又東逕汝陽

故城北東注於潁

中南頓縣故頓子國應劭曰頓迫於陳其後南徙故曰南頓二漢及晉屬汝南郡後魏置南頓郡北齊郡廢隋開皇六年改縣曰和城大業初復改曰南頓屬淮陽郡唐屬陳州 皇朝熙寧六年省入商水元祐元年復置

中西華縣二漢屬汝南郡晉省之後置長平縣隋開皇十八年改曰鴻溝大業初復改曰西華屬淮陽郡唐武德元年更名箕城屬陳州景雲元年復故名長平鎮漢爲長平縣屬汝南郡後漢屬陳國晉屬梁國北齊省入西華

上潁州春秋時爲胡國及楚地秦爲潁川郡地二漢屬汝南郡魏置汝陰郡晉因之後魏置潁川郡隋亦爲潁川復爲汝陰郡唐爲潁州 皇朝元豐二年升順昌軍節度今縣四

望汝陰縣西北有胡城故胡國二漢爲汝陰縣屬汝南郡魏置

地九

京西北路

九

汝陰郡後廢晉泰始二年復置隋開皇初郡廢大業初復置唐爲潁州二漢細陽縣屬汝南郡晉省之故城在今縣西北緊萬壽縣蓋二漢細陽縣地 皇朝開寶六年析汝陰之百尺鎮置萬壽縣屬潁州水經注云百尺水承次塘細陂南流注於潁鎮實因水爲名

緊潁上縣本楚慎縣地二漢屬汝南郡晉屬汝陰郡後廢焉梁置下蔡郡北齊郡廢隋大業初置潁上縣於故鄭城屬汝陰郡唐武德四年移於今治屬潁州慎縣故城在今縣西北緊沈丘縣本漢項縣地屬汝南郡後置沈丘縣隋開皇十六年置沈州領沈丘宛丘二縣唐初州廢以宛丘屬陳州沈丘屬潁州後省沈丘入汝陰神龍二年復置有武丘本曰丘頭魏王陵鎮壽春欲興兵討司馬宣王宣王自往征之軍至丘頭陵懼面縛水次故號爲武丘卽此

輔汝州東周爲王畿春秋爲戎蠻子邑及屬楚鄭戰國屬韓秦屬三川郡二漢屬河南潁川郡魏晉屬河南襄城郡後魏屬汝北魯陽郡東魏置北荊州後周改曰和州隋初置伊州煬帝初改爲汝州後廢州以其地屬襄城潁川二郡唐爲汝州天寶元年曰臨汝郡今縣五

中梁縣本漢周承休邑武帝元鼎四年行幸至洛陽詔封姬嘉爲周子南君以奉周祀初元五年以周子南君爲周承休侯邑屬潁川郡後魏曰汝源縣置汝北郡後改曰汝陰郡後周郡廢隋大業初改汝源爲承休置襄城郡唐爲汝州正觀元年改承休爲梁縣梁本周南鄙之邑在承休西南四十五里有霍陽聚左傳哀四年楚人爲一昔之期襲梁及霍是也戰國曰南梁以別大梁少梁焉漢屬河南郡後漢及晉皆因之隋屬襄城郡唐曰承休正觀元年省梁入承休而更名承休

地九

京西北路

十

曰梁西有廣成澤後漢作苑爲遊獵之地鄧太后臨朝試士以爲文德可興宜廢蒐狩之禮於是馬融作頌以諷焉後桓帝復校獵廣成今曰廣潤河蓋避朱梁廟諱也有患狐聚秦滅西周徙其君於此有陽人聚秦滅東周徙其君於此臨汝鎮唐先天元年置縣屬汝州正元八年以梁縣西界二鄉益之兼移縣於石城驛後入梁

緊襄城縣本鄭地南有汜城周襄王避叔帶之難出適鄭處于汜是也以襄王所居因曰襄城楚靈王築又有古不羹城在西北二漢屬潁川郡晉置襄城郡隋開皇初郡廢屬汝州大業初州廢屬潁川郡唐武德元年置汝州正觀元年州廢屬許州開元二十六年來屬

上葉縣本楚地惠王以封沈諸梁謂之葉公葉公好龍神龍下焉二漢屬南陽郡明帝時王喬爲葉令每月望常乘雙鳧入

朝今有墓在焉晉屬南陽國北齊置襄州後周廢州置南襄城郡隋開皇初郡廢屬許州唐開元三年置仙州二十六年州廢大厯四年復置仙州又析置仙鳧縣五年州廢省仙鳧入葉來屬二漢父城縣屬潁川郡晉屬襄城郡後廢入葉有應鄉故應國按汲冢古文商時已有應國矣周武王以封其子爲應侯故左傳言邗晉應韓武之穆也戰國爲秦所有以封范睢爲應侯有方城左傳所謂楚國方城以爲城卽此又有昆陽城卽光武破王尋之所

中魯山縣在夏爲魯縣陶唐氏旣衰其後有劉累爲御龍氏以事夏孔甲龍一雌死潛醢以食夏后旣而使求之懼而避於魯縣是也漢爲魯陽屬南陽郡後漢及晉皆因之後魏置荊州尋廢立魯陽郡後置魯州隋開皇初郡廢大業初州廢以魯縣屬襄城郡唐爲魯山武德四年復置魯州正觀九年州廢以魯山來屬故犍縣本鄭邑漢屬南陽郡後廢故城在今縣東南後周置三鵠鎮在縣西南十九里亦名平高城以備齊北齊置魯城在縣東北十七里以禦周

中龍興縣本湍陽縣唐武德四年置屬伊州正觀元年省證聖七年復置曰武興屬汝州神龍元年更名爲中興尋改曰龍興 皇朝熙寧四年省入魯城元祐元年復置

同下州信陽軍春秋時屬申其後屬楚秦屬南陽郡二漢屬南陽江夏郡晉置義陽郡宋置宋安郡南齊置司州梁因之有三關之隘北接陳汝控帶許洛宋以來常爲邊鎮後魏改曰郢州後周改曰申州隋開皇初郡廢大業二年改曰義州尋爲義陽郡唐爲申州天寶元年曰義陽郡 皇朝開寶九年降爲義陽軍太平興國元年改爲信陽今縣二

中下信陽縣二漢平氏縣地屬南陽郡晉分置義陽縣屬義陽

郡後廢焉宋曰平陽縣置宋安郡隋開皇初郡廢改平陽縣
爲義陽大業初置義陽郡唐爲申州 皇朝爲義陽軍太
平興國元年改義陽縣爲信陽漢鐘武縣屬江夏郡後漢省
焉故城在今縣東南漢鄆縣屬江夏郡後漢及晉因之北齊
改爲齊安置齊安郡隋開皇初郡廢改縣曰鐘山屬義陽郡
唐屬申州 皇朝開寶九年省入義陽有鐘山桐柏山淮
水

中下羅山縣二漢鄆縣地北齊置高安縣隋開皇初廢十六年
復置曰羅山屬義陽郡唐屬申州 皇朝屬信陽軍有石
城山甚高峻史記曰魏攻冥阨蓋謂此山也呂氏春秋言九
塞冥阨其一焉

地九

京西北路

十二

輿地廣記卷第九